



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL**

***Komunikadu Imprensa
06 Maiu 2014***

**Tribunál Distritál Dili kondena tinan 8 prizaun ho indemnizasaun ba kazu abuzu seksuál
ba menór**

Iha 05 Maiu 2014, Tribunál Distritál Dili kondena tinan 8 prizaun ba arguidu ne'ebé prátika krime abuzu seksuál ba menór ne'ebé sei ho idade 11 anos, no selu mós indiminizasaun US\$ 250,00 ba vítima.

Ministériu Públiku akuza katak iha 23 Setembru 2011, iha Distritu Aileu, maizumenus iha tuku 10:00 dadersan, arguidu rasta lezada no taka niaibun, kolu lezada nia roupa hodi halo relasaun seksuál ho lezada. Arguidu aproveita lezada mesak ba kuru bee iha posu ne'ebé mak dook husi uma hodi halo relasaun seksuál ho lezada. Aktu ne'e afeta ba saúde fíziku no psikolójika lezada nian.

"JSMP observa katak iha kazu abuzu seksuál ba menór, normalmente tribunál la inklui indemnizasaun ba vítima. JSMP hanoïn katak tuir lolos ba kazu sira hanesan ne'e importante tebes atu fó reparasaun liu-husi indemnizasaun ba vítima tanba labarik no nia familia sofre husi arguidu nia hahalok. Tanba ne'e, JSMP apresia desizaun ne'e, ne'ebé inklui indemnizasaun ba vítima" dehan Diretór Ezekutivu JSMP Luis de Oliveira Sampaio.

Ministériu Públiku akuza arguidu kontra artigu 177 husi Kódigu Penál kona-ba abuzu seksuál ba menór.

Tribunál konsidera katak faktus hirak provadu, katak arguidu prátika duni abuzu seksuál, bazea ba deklarasaun husi lezada no testemuña sira. Testemuña deklara katak sira hare duni arguidu halo relasaun seksuál ho lezada no sira depois sira hase no hakilar arguidu, tanba ne'e arguidu tauk no halai.

Depois avalia faktus provadu sira durante julgamentu, tribunál konklui hodi kondena arguidu ho pena prizaun tinan 8 no selu mós indemnizasaun ho valor US\$ 250.00.

Kazu ne'e rejista iha tribunál ho Númeru Prosesu: 644/2012/TDD. Julgamentu prezide husi juis kolektivu Dra. Ana Paula Fonseca, Dr. Hugu Pui, no Dra. Zulmira da Silva, Ministériu Públiku representa husi Dra. Gloria Alves no arguidu hetan defeza husi Dr. Rui Guterres husi Eskritóriu Defensória Públiku.

Atu hetan informasaun klean, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
telefone: 3323883/77295795
webiste: www.jsmp.tl
facebook www.facebook.com/timorleste.jsmp
twitter: @JSMPtl